


քարիալի գործակալն էր (արձ. 59): Այս վաշեն վանքին նվիրել է նաև ոսկետուփի ձեռագիր ավետարան, մի խաչ և գործք (առաքելոց):

Մեծ գավիթը կառուցված է Աստվածածնա արևմտյան և ներքին գավիթի հյուսիսային պատերին կից: Սա հարավից դեպի հյուսիս մի քիչ ձգված ուղղանկյուն քառանկյունի շենք է, որ արևելքից արևմուտք գնացող երկու շարք մասսիվ սյուներով աջարքով բա-

ժանված է միմյանց հավասար երեք թևի և ամեն մի թևն առանձին ծածկված է երկթեք սալածածկ տանիքով: Իր այս տիպով եզակի օրինակ է հայկական գավիթների մեջ և, ամենայն հավանականությամբ, կապվում է աշխարհիկ պալատական սյունազարդ դահլիճների հետ, որոնց օրինակները մեզ չեն հասել: Կառուցող վարպետները հայտնի չեն, հետաքրքիրն այն է, որ շինության արձանագրության մեջ այս գավիթը կոչվել է խորան:



Նկ. 8. Ներքին ժամատան հս մուտքը և կենտրոնական սյուներից մեկը մեծ ժամատան միջից:

Իր գոյության ընթացքում նշանակալից նորոգությունների չի ենթարկվել և վանքին ծառայել է իրրև գլխավոր տապանատուն: Այդ պատճառով էլ հատակը ծածկված է հարթ տապանաքարերով:

5. Մագիստրոսի ճեմարան: Այս շենքը հատուկ նպատակով չի կառուցված, այլ ինքնաբերաբար առաջացել է Աստվածածին և Ամենափրկիչ եկեղեցիներն իրար կողքի, բայց միմյանցից մոտ 4 մետր հեռու շինելու հետևանքով, նրանց արանքում: Այդ երևում է այն բանից, որ այս սրահի համար առանձին պատեր չեն կառուցել, այլ օգտագործել են երկու եկեղեցիների պատերը, նրանց կողքին շինելով որմնասյուներ, որոնց վրա դրել

են սրահի թաղակապ ծածկը: Այժմ էլ եկեղեցիների պատերը երևում են սրահի որմնասյուների արանքում: Ամենափրկիչ եկեղեցու հյուսիսային մուտքի մեծ մասն իր վարդարուն ճակատով մնացել է այս սրահի որմնասյուների տակ:

Այս «ճեմարանը» երկու եկեղեցիների արանքում արևելքից դեպի արևմուտք ձգված մի նեղ սրահ է, որի «Մագիստրոսի ճեմարան» անունը գրավոր չի հիշատակված, այլ վանքի միաբաններն այդպես են կոչել ավանդաբար:

Թեև իր վրա կառուցման վերաբերող կամ այլ բովանդակությամբ հին արձանագրություն չունի, բայց, ամենայն հավանա-